

Energia aurrezteko plan bat iragarri du Jospinek berotegi efektuari aurre egiteko

Mundu osoko 1.700 adituk klima aldaketari buruzko konferentzia hasi dute Lionen

Agentziak / Lion

Munduko 154 herrialdetako 1.700 aditu inguru bildu ziren atzo Lionen (Frantzia) klima aldaketari buruzko konferentzia batean. Datorren aza-

roan Hagan (Holanda) egin behar duten bilkura prestatu egin behar dute konferentzian. Hagako bilkuran zehaztu behar dute Kiotoko konferentzian hitzartu zituzten CO₂ eta bestelako gasen isurketaren murriz-

tea nola aurrera eraman. Lionel Jospin Frantziako lehendakariak ireki zuen konferentzia, eta iragarri zuen bere gobernuak energia aurrezteko eta erregai fosilen kontsumoa murrizteko plan bat onartuko duela.

LIONEN atzo hasi zen konferentziak datorren ostirala arte iraungo du, eta hartan, hainbat herrialdetako gobernuetako ordezkariak —gainerako adituekin batera— prestatu beharko dute azaroan Hagan (Holanda) izango den klima aldaketari buruzko goi bilera erabakigarria.

Izan ere, Hagan hitzartu beharko dute Kiotoko hitzarmena sinatu zuten herrialde guztiek nola betearaziko duten akordioa. Hain zuzen ere, Kioton erabaki zuten 2008 eta 2012 urteen artean CO₂ isurketak 1990ekoak baino %5,2 txikiagoak izatea.

Lionel Jospin Frantziako gobernuburuak ireki zuen Liongo konferentzia, eta berretsi zuen bere gobernuaren engaia mendua energia fosilen aurreztearen alde. Norabide horretan, Frantziako Gobernuak plan bat prestatzen ari dela iragarri zuen Jospinek, eta Hagan aurkeztuko duela gaineratu.

«Energia fosila aurrezteko, berotegi efektuaren aurkako borrokari egiten diogun ekarpenaz gain, garapen indartsu eta iraunkorrari eusteko bide ezin hobea da», azaldu zuen atzo Jospinek.

Jospinek ez zuen zehazta-



PATRICK GARDIN-AP

Lionel Jospin, atzo, klima aldaketari buruzko Liongo konferentziaren hasiera ekitaldian.

penik eman nahi izan bere gobernuaren planaren inguruan, baina adierazi zuen «gutxi gorabehera» 1973ko petrolioaren krisian aurrera eraman zen planarekin parekagarria dela.

1997an munduko herrial-

de gehienek sinatu zuten Kiotoko hitzarmena, petrolio, ikatza eta beste zenbait erregai fosil erretzeak eragiten duen CO₂ isurketak murrizteko helburuarekin. Izan ere, isurketa horiek ozono geruzaren deusezte

eta berotegi efektua eragiten baitituzte, besteak beste.

Hain zuzen ere, aditu eta zientzialari batzuek diotenez, datozen 100 urteotan 1,3 eta 5 grado artean igo daitezke tenperatuak planeta osoan.

Estrategia desberdinak

Jakina denez, Kiotoko kopuruetara hurbiltzeko herrialde batzuek CO₂ren isurketen murrizte handiak egin behar dituzte, eta horiei aurre egiteko arazoak paratzen dituzte. Esaterako, EEBBek nahi dute CO₂ isurtze eskubideak erosi ahal izatea, askatasun osoz, 1990eko mugetara iritsi ez diren herrialdeei.

Europako Batasunak, askatasun osoz ez, baizik eta erosketak gehienez %50 izatea eskatzen du.

EEBBen estrategiaren alde agertu dira, besteak beste, Japonia, Australia, Zelanda Berria eta Kanada.

Bestaldean daude herrialde pobreak. Izan ere, haiek dirulaguntzak eskatzen dituzte galdegiten dizkieten konpromisoak egiteko.

Herrialde horiei eskatu zien Jospinek babes dezatela Kiotoko hitzarmena eta ez dezatela arazorik jar, berotegi efektuak haietan baitu eraginik handienetakoa.

Jospinek azaldu zuenez, berotegi efektuaren aurkako borroka horretan «herrialde bakoitzak erantzukizun zehatzak ditu. Premiazkoa da, argitasunez eta esku zabaltasunez, aurkitzea gure planeta babesteko dituzten neurriak». Izan ere, Frantziako gobernuburuak adierazi zuen datozen belaunaldiak egungo agintariak egiten duten politikaren menpe izan daitezkeela.

Bestalde, erakunde ekologikiek protesta ekintzak egin zituzten atzo Lionen Frantziako Gobernuak babesten duen energia nuklearra gaitzesteko. Ekologistek «arriskutsutzat» jo zuten energia hori, eta oroitarazi Frantzian kontsumitzen den energia gehienaren iturburua dela.



B I H A R ▼ ▼ ▼ ▼ ▼ ▼ ▼

Hasi eta hezi gehigarria

Ikasliburuen liberalizazioaren arriskuak ○

Hezkuntza alternatiboaren eredu desberdinak ○

Eskolatzearen gastuak ○

Aisiaren garrantzia ○

Elkarriketak ○

Egunkaria